

Mbanjnazleiz:

Aen Bozvuzgvanj Ranzcanx Gaeuqgeq Ndeu

德保县那雷屯——纯干栏建筑生态博物馆

□ Cioz Cwngz Cau Caub iogj



▲ Roeniq iet ok rog bya.

▲ Rin、namh、faex benj gaqgyoeb baenz ranzcanx.

◀ Ranzcanx vax baenz caengz baenz coij baiz caezcingj.



▲ Raemxmboq lae gvaq naj ranz laeng ranz.



▲ Gyoengq vunzmbanj youq mbanj gaeuq gvaqciet.



▲ Aenrum、sakrin baij youq naj ranz.



▲ Doubenij lij genq dingj ndit cik fwn rwed.

Dwzbaui Yen Cuzyungz Cin Nazlieng Cunh Mbanjnazleiz yienz-naeuz liz yienhsingz cij miz cibgeij goengleix gyae, hoeng aen mbanj miz 72 aen ranzcanx vax gaeuq neix mbouj cab miz saek aen ranzlaeuz suijniz, louzce yiengh ranzcanx rin guh giek faex benj guh ciengz guh bam gang vax haenx ndaej caezcingj, aeu seizdaih seizneix daeuj gangj caen mbouj raen miz geijlai aen.

Mbanjnazleiz dieg youq gwnz aen bo henz roen yienhsingz daengz Yungzvaz Yangn ndeu, daj giz gyae yawj bae, ndaw mbanj miz roek caet coij ranzcanx, ing bo hwnjguh, baenz mbaek bin doxhwnj, baenz caengz baenz coij. Naj mbanj cix dwg Dieggumh Nazlieng namh bizbwd haenx, Dahgensuij ngutngeuj con

gvaqbae, cungqgyang nem seiqhenz dieggumh miz hagdangz、dienhcamh caeuq aenmbanj, ranzlaeuz ndeiyaew baenz benq baenz gyoengq gyoeb-baenz fuk veh gyaundeideu. Byaij haeuj Mbanjnazleiz, gij roen ndaw mbanj dingz lai dwg aeu ndaekrin bu baenz, gwnz rin gaeng deng muz dwk ngaenzngubngub. Ca mbouj lai ranzranz najranz cungj baij cuengq miz aenrumrin hunghung iqiq haenx, mbangj lij baij miz ruqrin gueng mou、vaiz、max、gaeq bit haenx, hawj vunz yawjraen le dauqngex gij saedceij gaxgonq. Ranzranz cungj aeu gij rindiuz ginggvaq gyagoeng haenx caep baenz mbaeklae, itbuen cungj miz cibgeij mbaek doeng daengz gwnz bam vunz youq haenx; mbangj ranz lij aeu rindiuz ma guh begdou, daengz

seizneix lij mbouj hed bae saek di, ndeiyaew youh naihyungh. Moix aen ranzcanx cungj dwg rin namh faex habgap baenz gyaqgvaengh, daejgiek aeu diuz saeurin sang lumj boux vunzhung nei daemx hwnjdaeu, gyaqgvaengh faex onjdwat dwk gaq youq gwnz saeurin, faqciengz aeu namhnding cuk baenz, guhbaenz aen ranzcanx faex gwnz gyang laj sam caengz ndeu; moix aen ranz dangqnaj cungj aeu donghrin roxnaeuz dongh-faex dingdaemx guh baenz aen canxdak ndeu, mbangj lij geij ranz lien baenz benq doxaemh yungh. Ciuq goenglaux ndaw mbanj gangj, gij ranz aen mbanj neix aen ceiq gaeuq haenx gaeng miz baenz song bak bi lizsij. Bi 2008 gyoengqvunz aen mbanj neix gaeng senj bae daengz aen mbanj moq ranzlaeuz ranz suijniz henz goengloh haenx youq, aen mbanj gaeuq ranzcanx vax liz mbanj moq ngamq bak lai mij gyae neix vunzmbanj couh aeu daeuj gyaeng doenghduz roxnaeuz cuengq doxgaiq cab, baenzneix yiengh gaeuq aenmbanj couh ndaej caezcingj louzce roengzdaeu.

Seizneix, Dwzbaui Yen gaeng doenghfwngz bae baujhoh caeuq coihcingj gij yiengh gaeuq ranzcanx Mbanjnazleiz, yaek aeu benq ranzcanx vax gaeuq neix guh bingz-daiz, haenqrengz unglab gij hong-saeh miz daegsaek daegdiemj dang-dieg haenx, haifat hongsaeh daegsaek baijyienj vwnzva Bouxcuengh、daejniemh gijgwn gijninz lajmbanj、suenmak reihbyaek mbaetsou doengh gijneix, guh hung guh ak ranzcanx Bouxcuengh vwnzva lijyouz binjbaiz, gyagiengz lijyouz banggunz, daiq-doengh gyoengq vunz lai henzgyawj doenggvaq camgya guh gij hongsaeh neix demlai souhaeu, cingqaen souh'ik ndaej vut gungz baenz fouq.



▲ Mbaeklae najranz.



▲ Ranzcanx gaeuq lij maenhdwdwt.



▲ Donghrin laerin daeg-saek yienhda.



▲ Ndaw mbanj gaeuq lij ciengx miz doenghduz.